

## Fleadh Cheoil na hÉireann 2013

### Ceist 1

Beidh tú ag féachaint ar ball ar thuairisc faoi óstú Fhleadh Cheoil na hÉireann na bliana seo chugainn. Sula bhféachann tú ar an tuairisc, déan iarracht na ceisteanna seo a leanas a fhreagairt:

Cén chathair ó thuaidh atá luaite le Fleadh na bliana seo chugainn?

Cá raibh an Fleadh Cheoil le dhá bhliain anuas?

Cén mhí den bhliain a bhíonn an Fleadh ar siúl de ghnáth?

Ar fhreastail tú féin ar an bhFleadh riamh?

### Ceist 2

Anois gan féachaint go fóill, déan iarracht na focail Ghaeilge a mheaitseáil leis na focail Bhéarla seo. Cuir do chuid freagraí i gcomparáid le freagraí an duine in aice leat.

Reáchtáil \_\_\_\_\_ Threat

Bagairt \_\_\_\_\_ Because of

Easaontóirí \_\_\_\_\_ Bomb

Teorainn \_\_\_\_\_ United Kingdom

Siocair \_\_\_\_\_ Appeal

Ríocht Aontaithe \_\_\_\_\_ Organise

Buama \_\_\_\_\_ Dissidents

Diúltaigh \_\_\_\_\_ Border

Achomharc \_\_\_\_\_ Refuse

### Ceist 3

Anois féach ar an mír agus déan iarracht na ceisteanna thíos a fhreagairt.

1. Cén fáth gur theastaigh ó Chathair Dhoire go mbeadh an Fleadh ann sa bhliain 2013?
2. Cén dream a phlandáil an dá bhuama i nDoire an tseachtain seo caite?
3. Cén fáth go bhfuil fiosrú ar bun faoi chinneadh Chomhairle Uladh?
4. Ainmnigh an dá bhaile eile a bhfuil iarratas istigh acu do Fleadh na bliana seo chugainn.
5. Cén sprioclá atá ag Doire rudaí a chur ina gceart leis an iarratas?

**Ceist 4** Anois, féach ar an mír arís agus déan iarracht focail a aimsiú sa sliocht a bhfuil an bhrí chéanna acu leis na focail thíos.

A eagrú \_\_\_\_\_

Mar gheall air \_\_\_\_\_

An Bhreatain \_\_\_\_\_

In aghaidh \_\_\_\_\_

Cén fáth \_\_\_\_\_

Nasc \_\_\_\_\_

I láthair na huaire \_\_\_\_\_

**Ceist 5** ‘Phléasc *dhá bhuama...*’

Déan iarracht na habairtí thíos a scríobh amach i bhfoirm focal.

20 x bó

18 x litir

2 x gallún

8 x builín

12 x mála

19 x duine

100,000 x gasúr

7 x cat & 5 x madra

15 x buachaill

150 x carr

**Ceist 6** Déan an ráiteas thíos a phlé. Is féidir é a úsáid mar rún díospóireachta.

‘Níor cheart comórtas nó féile a bhaineann le cultúr na nGael a óstú agus a cheiliúradh sa Ríocht Aontaithe’

## Treoracha

**Ceist 1** Tá Cathair Dhoire luaite le Fleadh 2013  
Bhí an Fleadh i mBaile an Chabháin le dhá bhliain anuas  
Is ag deireadh Mhí Lúnasa a reáchtáítear é.

**Ceist 2** Reáchtáil \_\_\_\_\_ Organise  
Bagairt \_\_\_\_\_ Threat  
Easaontóirí \_\_\_\_\_ Dissidents  
Teorainn \_\_\_\_\_ Border  
Siocair \_\_\_\_\_ Because of  
Ríocht Aontaithe \_\_\_\_\_ United Kingdom  
Buama \_\_\_\_\_ Bomb  
Diúltaigh \_\_\_\_\_ Refuse  
Achomarc \_\_\_\_\_ Appeal

**Ceist 3**

1. Bhí Doire ag iarraidh Fleadh ann sa bhliain 2013 mar gur Cathair Chultúir de chuid na Ríochta Aontaithe í an bhliain sin.
2. Is easaontóirí poblachtánacha a phlandáil an dá bhuama i nDoire an tseachtain seo caite.
3. Tá fiosrú ar bun faoi chinneadh Chomhairle Uladh mar gheall gur fochoiste a rinne an cinneadh seachas an Chomhairle iomlán.
4. Tá iarratas istigh ag Sligeach agus ag Inis an Chláir.
5. Is é an Satharn seo chugainn an sprioc atá ag Doire rudaí a chur ina gceart leis an iarratas.

**Ceist 4**

A eagrú	<b>A reachtáil</b>
Mar gheall ar	<b>Siocair</b>
An Bhreatain	<b>An Ríocht Aontaithe</b>
In aghaidh	<b>In éadan</b>
Cén fáth	<b>Cad ina thaobh</b>
Nasc	<b>Ceangal</b>
I láthair na huaire	<b>Faoi láthair</b>

**Ceist 5** ‘Phléasc **dhá bhuma...**’  
Déan iarracht na habairtí thíos a scríobh amach i bhfoirm focal.

Fiche bó  
Ocht litir déag  
Dhá ghallún  
Ocht mbuilín  
Dhá mhála dhéag  
Naoi nduine dhéag  
Céad míle gasúr  
Seacht gcat agus cúig mhadra  
Cúig bhuaichill déag  
Céad caoga carr

**Ceist 6** Is féidir an ráiteas a phlé nó é a úsáid mar rún díospóireachta.

## **Áine Lally**

Tá Comhairle Uladh de Chomhaltas Ceoltóirí Éireann cáinte faoi gur dhiúltaigh siad d'iarratas Dhoire, Fleadh Cheoil na hÉireann a reachtáil sa chathair<sup>1</sup> an bhliain seo chugainn. Deir comhairle Uladh gur mar gheall ar bhagairt ó easaontóirí poblachtacha a glacadh an cinneadh.

## **Áine Ní Ghallchóir**

Faoi iarratas Dhoire chun Fleadh Cheoil na hÉireann a reachtáil ó thuaidh den teorainn den chéad uair riamh, bheadh sé ar siúl le linn bhliain chathair an chultúr na Ríochta Aontaithe. Siocar an ceangal leis an Ríocht Aontaithe tá roinnt ball ina choinne, ach Dé Céadaoin<sup>2</sup> seo caite d'aontaigh bord an Chontae tacú leis an iarratas. An lá dar gcionn phléasc dhá bhuama sa chathair agus aréir dhiúltaigh Comhairle Uladh den Chomhaltas tacú leis an iarratas siocar an bhagairt ó easaontóirí poblachtacha a dúirt siad<sup>3</sup>. Tá achomharc déanta anois ag comhaltas Dhoire

## **Gearóid ó hEára**

Níl sé ceart go mbeadh comhaltas sa<sup>4</sup> tuaisceart ag diúltú rud a chur ar aghaidh chuig an ardchomhairle. Seo é an chéad uair i stair Comhaltas Ceoltóirí Éireann gur tharla seo, go ndeachaigh Cúige in éadan iarratas a tháinig ó thaobh istigh den Chúige céanna.

## **Áine Ní Ghallchóir**

Deir Ardstiúrthóir an Chomhaltais go bhfuil ceisteanna le freagairt ag Comhairle Uladh maidir le seasamh an cinneadh a ghlac siad nuair a glacadh cinneadh roimhe seo tacú leis an iarratas.

## **Labhrás Ó Murchú**

Inné, ní an chomhairle<sup>5</sup> iomlán a bhí ag teacht le chéile, mar sin<sup>6</sup> tá fiosrú ar siúl cad ina thaobh<sup>7</sup> go ndearna<sup>8</sup> fochoiste de Chomhairle Uladh athrú ar an gcinneadh a bhí déanta go dtí seo.

## **Áine Ní Ghallchóir**

Faoi láthair tá iarratas istigh ag Sligeach agus ag Inis i gContae an Chláir chun Fleadh Cheoil na hÉireann a óstú an bhliain seo chugainn. Níl ach go dtí<sup>9</sup> an Satharn seo ag Doire an bealach a réiteach dá n-iarratas sula ndéanfaidh Ardchomhairle Chomhaltas Ceoltóirí Éireann an cinneadh deiridh.

Áine Ní Ghallchóir, Nuacht TG4, Doire.

---

<sup>1</sup> Sa gCathair a deirtear sa mhír

<sup>2</sup> Dé Céadaoine a deirtear

<sup>3</sup> dúradar a deirtear go canúnach

<sup>4</sup> insan a deirtear sa mhír

<sup>5</sup> An comhairle a deirtear

<sup>6</sup> 'so' a deirtear sa mhír

<sup>7</sup> canathaobh a deirtear

<sup>8</sup> 'gur dhein' a deirtear sa mhír. Tá sé seo canúnach

<sup>9</sup> Níl go dtí ach an...a deirtear